


據曾氏
家藏本

曾文正公全集

批
牘



第廿四冊

大遼圖書供應社刊行

曾文正公批牘

咸豐三年正月起到八月長沙行轅欽命幫辦團練查匪事務

■安福稟到任日期並查明地方現在安靜容俟體察情形辦理保甲團練以靖盜風由

遠賊必有近窩清查戶口團練保甲此爲治盜第一要法惟保甲之法不經書役之手必須責成紳耆辦理當切商訪紳耆中之公正而肯任事者令其認真舉行一二處行之有效則他處皆取則矣快役以獲盜之多寡定功過亦有流弊若非實指某處某賊令其前往擒拏泛泛海捕恐有誣拏平民之患不可不慎

■安化稟報朱起鳳上控一案現又結獲搶犯謝位敬等隨後起解由

據稟已悉仰卽於日內解到其誣德聽誣廷雲二犯尤屬認真緝拏務獲究辦此案必應斬決之犯究以何名爲最要何名爲次要仰該縣細心訪查於原告被告之外傳紳耆區區推求密行稟聞本部堂亦旁詢博訪互相研證以期不枉殺一人不寬縱一人想該縣能體我苦衷也

■常寧縣稟復遵辦情形往並齋分給信函各紳耆姓名由

紳士如此齊心則該縣之能得民心而作士氣已可想見本堂現刻有鄉族團執照族團執照鈐用關防凡紳士來行轅具領卽可用爲約束鄉族之具使不肖者不得藉口報復庶公處者得以放手辦事該縣可傳諭各紳耆令其自來領取

■常寧訓導稟請查教匪盜竊賊外更請通飭查窮民尾粵賊行搶由

據稟已悉三等匪徒情形洞悉頗末窮民尾從本是乞丐之子從賊稍熟卽是不軌之徒雖其父兄亦有不能約束之勢而遠出未歸卽父兄亦不知其何往今概向其父兄追究下落責問歸期恐強人以所難而於事仍無益惟

清查戶口，責成各團總，各族族長，於冊內記出某戶某人遠出未歸字樣，以便稽查。庶他日歸來，得以分別究治，仰該學裁酌辦理。

■衡清稟報紳商捐貲募勇，應否事竣後准予獎勵前雇鄉勇一時難以裁撤，仍請留防由。

衡山攸縣等縣土匪，既已次第勦滅，道州車頭山何賤苟滋事，亦已捕治多名，上游四屬一律肅清。該二縣所雇之勇二百名，可於近日全撤，以節糜費。即紳商捐辦之六百名，亦可盡數裁撤。募勇一事，本利少而害多，各匪業已殄滅，即宜趕緊散遣，無久募留致滋流弊。

■湘陰稟報到任日期由。

此時急務，莫先於查拏匪人，以安善良。匪人難於訪求確實，不得不聯絡紳耆，藉廣耳目。該縣務宜周諮公正紳耆，縱有偶受欺蔽之時，而受益處究多也。

■稟聽擺坐拏等事，瀏陽武舉劉名顯一案。

各處匪徒，經各驛訊明正法者甚多。各團紳耆嚴拏匪犯，解送官辦，皆係歷奉聖諭，屢張告示，假其權於本鄉之良民，以佐官吏所不及。紳耆之拏犯，一以保全地方，一以遵奉示諭，不得已也。若已經正法之人，其父兄子弟紛紛坐拏，是以王法為戲事，與官長為仇，此風斷不可長。仰瀏陽縣飭拏劉文喜到案訊辦，仍詳報備查。

■新寧稟到任日期由。

新寧本邊要之區，又齋匪聚集甚多，若非案案痛懲，時時訪察，則乘間竊發，實為堪虞。易教諭杜訓導及職員江忠濬皆明練而兼實心任事，團練事宜即可與三人商辦。總以各團嚴立規條，不許容留匪類為要。

■永順稟查明卑縣向無會匪，其前次訪出盜賊痞棍姓名分別已未獲辦情形，並遵札認真查拏審辦由。辦理盜賊痞棍，井然有條，其未獲各犯，仍仰認真緝拏，無少疎懈。當此有事之秋，奸民狡焉思逞，不隨時懲治，則

恐釀成巨案。斷不拘泥常例，稍存姑息，想良有司必有洞達時務之偉識也。

■桑植稟遵照勦辦土匪以靖地方由

地方雖已安靜，仍當不時查察，務期有案必破，有犯必懲。又該縣與西陽州交界之所，開萬山叢薄，極爲險峻難行。仰該縣開一由縣至西路程單，繪一地圖呈覽，以備查核。

■嘉禾縣稟現在團練靖匪由

現在團練之道，以本處不容留匪人爲第一要務。本境既清，然後練丁習藝，以備鄰境之土匪。處處如此，則匪徒自無駐足之區。本部堂現刻有鄉團執照、族團執照，俾公正紳耆收執，爲查拏匪徒之據。仰該縣傳諭紳耆中有實心任事者，來領其領。

■衡山縣稟上控之謝質彬實係李耀供伊貢獻是以差傳並請就近委員審辦由

土匪猝起，聚衆至千餘人，鄉民動遭搶劫，實有無可如何之勢。仰該縣細心質訊，如果謝質彬諸人甘心貢獻，資助糧食，則應按律擬辦。若曹李諸犯過境，該民人等實被搶劫，則當恕其可矜之情，寬其不報之咎。該縣訊明之後，趕緊稟覆，暫緩委員查辦。若訪得曹李各逆，在鄉搶劫，實多被害之家，竟不必拘傳，亦省株累之法也。該縣酌之。

■桂陽州稟團練查辦土匪實情貼過奉法告示地方並分送諭團紳士名單由

現在土匪潛藏，乘間竊發，在在而有之。而郴桂一帶，去年從粵寇東下者，實繁有徒。今歲飽掠逃回，又或煽誘無賴，蠕蠕欲動，故立團之法，總以不許容留匪人爲第一要義。仰該牧傳諭紳耆，凡有去歲出門，今歲來歸者，各村嚴拏稟究，務絕根株，至要至要。

■保靖縣稟奉發團練告示信函現在遵照辦理由

據稟已悉，古人謂感人以言，其本已淺，區區文告，何敢遽冀治民之心。惟期賢有司進百姓而親訓迪之，真實惻

但之意，達於面貌，則感悅畏服之忱，動於肺腑矣。訟事完畢之後，當堂語誠，此時最足感人。今日之民，官可使之立見信從者，惟勤於聽訟，伸理冤抑，則見效甚速。即囑紳耆，辦團拏匪，亦須先使信從，然後其言易入。聞該縣平日甚得民心，故復諄諄商論也。

■新寧縣稟覆遵辦團練並照刊奉發告示偏貼由

從前辦理較嚴，此三年內，遂獲乂安。可見今日爲治，非火烈不能奏功。該縣齋匪，聞至今尙多，仍仰嚴懲曲勸。縱不能救已吃齋之民，挽之使歸於正，亦當防未吃齋之民，戒之使不入於邪。該縣與兩學及本道紳耆，尤當設法力圖此事，至切至切。

■宜章縣稟縣差探廣東陽山縣屬之戊王坑地方有匪徒聚集窺伺邊界現已會營派撥兵勇扼要嚴行防禦由

久聞該縣撲實明練，遇事有識。觀此稟呈報賊勢，不涉張皇，籌畫防堵，亦甚妥協，足徵訪聞之不謬。現派守備滕遇春田宗全把總張萬書外委鄒臨英共帶三廳精兵七百廿人，歸前任廣西知州張榮組統領。因桂東桂陽一帶，有江西股匪，入楚滋擾，其情形較宜章更爲喫緊，已飭張牧督兵先往桂東桂陽查辦。俟勦捕完畢，再由臨武至該縣堵剿廣匪。又有一札與桂陽王參將會同張牧妥辦一切。如宜章臨武賊勢緊急，則張牧王參將二人分兵堵禦。張牧到桂東時，必能權衡緩急，相機進止。其未到臨宜以前，即責成該縣及王參將力禦廣匪，無少疏懈。是爲至要。

■署衡永道兼衡州府稟桂東縣有陰匪竄擾戕害汛官已飛咨永州鎮調兵應援由

據稟已悉。桂陽亦有稟報，有匪千餘人，在集龍熟水毗連江西之古亭豐洲等處，私造鎗礮，欲入桂陽滋擾等因。王參將調永定營兵一百名，至桂陽防堵，尙非不知輕重，想警報已到衡矣。頃已派守備滕遇春守備田宗全把總張萬書外委鄒明英等，帶三廳精兵七百廿人，歸前任廣西知州張榮組統領前往勦辦。因江西匪徒業入楚境，戕

害武弁桂東桂陽尤爲喫緊飭令派員弁等併力先將此股撲滅然後提兵迤南至臨武宜章一帶堵剿廣東股匪又札王參將與張牧會商若西匪廣匪須同時並剿則該二人分兵辦諸事宜相機分合此間不爲預制張王二人尙有膽識此路或可迅就肅清一切籌辦都以附聞

■江華縣稟奉到團防告示并紳士信件均已分送各鄉遵照辦理由

團練二字宜分看團卽保甲之法清查戶口不許容留匪人一言盡之矣練則製械選丁請師造旗爲費較多永衡各屬從廣匪東去者甚多現在中途逃回本籍難保其不再爲匪練法縱可不精團規斷不可不講仰該縣聯絡紳耆細心辦理

■巴陵縣稟卑縣拏獲土匪但其仁等七十一名業已先後訊明正法由

拏獲土匪至七十一名之多實堪嘉尙現聞岳州宵小斂迹幾有道不拾遺之風可見火烈民畏乃今日救時之良劑也更期堅執不懈訟棍痞匪一例嚴辦尤可日臻上理

■龍山縣稟遵奉諭稽查土匪由

凡匪徒構訟務須隨時懲治地痞訟棍與著名之土匪氣類相合嚴辦數人宵小自然斂迹幸勿稍存姑息也

■宜章縣稟報探明廣東陽山縣屬匪徒竄至蒲塘地方經連州官兵勦捕現竄泉屯聚滋擾卑縣仍督率弁兵壯勇在於交界要隘嚴行堵禦由

現在雖派有鎮守精兵前往惟業經飭令先勦桂東桂陽之江匪後堵宜章臨武之廣匪急切尙不能到宜仰該縣督率兵勇團丁嚴防密禦如有警急一面通稟一面函告帶兵官前任廣西知州張榮組分別緩急相機辦理王參將勇敢明練本部堂早有所聞該縣布置周妥不涉張皇亦於兩稟具見平日之能得民心不特宜章恃二人以固吾圉卽臨武一路亦冀該將該縣細心籌畫無分畛域至要至要

○衡水道稟郴州桂東縣稟報被匪情形甚爲危急轉請迅即發兵援救以全地方由

昨已派前廣西知州張牧統帶三廳精兵七百餘人前往勦辦茲准來稟又加派夏署道添帶兵勇即日前去督勦借守隘爲名先期出城此最爲近來惡習王參將統兵二百應足以資堵禦郴桂匪徒亦極多俟張牧與王參將會晤後梅牧即宜速還本任

○興寧縣稟雇募壯勇堵截桂東賊匪由

堵截要隘須聯絡本邑紳耆情形較熟又須令紳耆廣覓的實探卒時時報明大營并稟省垣以期息息相通是爲至要

○鳳凰廳稟卑縣遵辦團練緝捕由

據稟詳悉團練二字須分看團卽保甲之法清查戶口不許容留匪人一言盡之矣練則簡兵請師製械造旗爲費頗多故鄉民不肯舉行本部堂每與各州縣道及宜鄉開團而不練城廂練而不多庶幾有益而易行來稟所稱募勇無事緝捕有事堵勦卽城廂宜練之說但不宜太多恐經費無出轉難持久惟賢有司酌裁焉

○永州府稟奉督札飭拏東安痞棍唐國華業已先期誘獲現發零陵羈收飭令東安召告容俟差飭提審錄供稟辦由

去此一毒則東安無復生變之患凡巨案旣成屢年干戈而不能靖者其初則一力士縛而有餘此痞旣除東安士民積憤爲之一舒也第久羈獄中仍恐其徒黨生心致滋意外之虞仰卽嚴刑審訊一面正法一面肅送供摺不必拘守常例是爲至要

○永州府新田縣訓導李傳敏首先拏獲道州謀逆首犯何賤苟現已獲解到府嚴行收禁由何賤苟就獲甚快人心訊明後一面肅呈供摺一面正法梟示不必再行解省昨未陽拏獲尹安恆批令解省途

次扭斷鐵鎖，大呼朋類，幾乎誤事。旋在途自斃，到省戮屍。此等元惡，長途恐有不測，不如就地正法爲要。近日該府獲唐國華何賤苟，未陽獲尹安恆，永興獲劉大統劉高明，皆極要之犯，暗中消弭幾巨案。李教諭博學能文，本部堂夙所知聞，又能擒拏劇賊，益徵有用之才，候會商請獎。

■永興縣稟桂東土匪潛山鄺縣安仁小徑竄入卑境之十九都三河洲獅子寨屯札由

據稟已悉，桂東范令來稟，則稱賊分二股回竄，一竄上游鵝形，一竄龍泉大汾墟。該縣所稱獅子寨之匪，不知卽係江匪分股來竄，抑係吾楚有另起匪徒？仰更查明稟復。紳士劉茂庭之子劉紹堂，本部堂正欲保奏，茲又有此事，該貢生父子，正可大爲効力。其劉長松李燮南陳步元亦能傳諭，令其努力殺賊，不惜從優獎敘。並令多雇偵卒，一面探聽賊情，一面迎接大兵，隨地嚮導，是爲至要。

■前廣州知州張桂陽參將王稟奉委督帶兵勇回勦江廣賊匪由

據稟已悉，該匪竄回大汾墟鵝形墟等處，應卽無分畛域，追過江右境界，直抵賊巢，堵穴擒渠，斷不可稍存畏難之見，中道而返，致江匪或留餘孽，又成不了之局。又聞永興有土匪竄擾十九都之獅子寨，已飭夏道管帶湘勇，在彼勦辦。該牧等但將大汾鵝形之匪，盡數撲滅，不必兼顧永興之匪。此間遙擬如此，倘有不便，仍由該牧等酌量時宜，相機進止，此間亦不掣制也。

■攸縣稟暫留郭令幫辦保甲團練由

郭令旣爲士民愛戴，應允其暫留該縣，幫辦團練，以期該紳聯絡。該縣北鄉天都有陳湖春控張仕湖一案，郭令現在離任，各鄉皆可周履，父老兒童，皆可聚談。仰卽傳知該令前往天都地方，細訪陳湖春一案，始終本末，究竟如何密行稟覆，以憑核辦，無得漏洩風聲，亦不可稍有含糊，是爲至要。

■常德府稟卑府親歷各縣巡查情形並現辦緝匪各事宜由

民所以不樂從團練之說者，以其斂費或多，恐經手者有侵牟之弊，徒傷財而乏實效耳。但用其人，不費其財，則貧富皆樂於從事，可期漸收實效。

■永興縣稟探得耒陽地方廠下大河灘等處土匪聚衆滋事由

現經派委教諭劉長佑守備李輔朝生員王奎等管帶楚勇五百，湘勇二百，前往進剿。仰該縣協同兜捕，並探明賊首蹤跡，進兵途徑，一面遣人至耒陽清泉一帶，迎導大兵，一面飛稟省城。又給永興武舉陳步元貢生劉茂廷各飭一札，即行飭差送往，令其出力堵截，以期迅速撲滅。

■衡山縣稟現有土匪勾結滋事請趕調官兵勦辦由

前派楚勇湘勇共八百人，往常寧嘉禾勦辦土匪。頃聞常寧事已解散，兵勇即可撤回，已於初五日，由六百里札飭教諭劉長佑生員王奎管帶湘勇楚勇，馳往衡山，迅速勦辦。該教諭等由常寧嘉禾一帶折回，不過四五日，即可直抵衡山，無難即時撲滅。該縣惟當遴派親信丁役偵探的確賊首，果在何處，進兵應由何路，一一探明，一面遣人至衡州一帶，迎接大兵，一面飛稟省城。其該處鄉團，有公正紳耆，亦由該州設法聯絡，令其多覓眼線，無令首犯逃竄，是爲至要。

■衡山縣稟會營親往四鄉查拏土匪情形由

前稟云：「初二酉刻，探得賊在霞流站地方。」此云：「初三早，又探得在霞流站。」該縣會營親往，即應徑至霞流站迎剿。若不能迎剿，即應固守縣城，慎無往四鄉無賊處，反令城內人驚惶也。

■衡陽清泉稟衡山縣之道字號有土匪滋事由

劉長佑所帶之楚勇五百名，須全數同至衡陽進剿，斷不可留三百在衡郡守。蓋土匪初起，即宜以全力撲之，若兵力一分，恐難期一鼓成擒，反非善策。該二縣接此批，立即傳諭劉長佑，令其全赴衡山，迅速勦辦，不可稍有遷延。

至切至要外與劉長佑書信若已前往衡山卽專人送往

■衡山縣稟請趕緊加調重兵來縣勦匪由

據衡清二縣來稟於楚勇湘勇八百人中以五百赴衡山勦賊以三百留守郡城等語頃已批回令其全數來衡山進剿不可留一人在郡由六百里諭知該帶兵委員矣土匪初起有八百精兵足資兜剿楚勇乃百戰勝兵想可迅速撲滅如果更有蔓延本部堂卽統帶兵勇親往進剿該縣惟當多覓眼線探明賊巢所在匪徒實在人數若干飛稟省城慎勿稍涉張皇致使人心搖動是爲至要

■教諭劉長佑稟帶勇折回衡山勦捕土匪由

初六日申刻接衡清二縣來稟請以湘勇三百楚勇二百往衡山勦賊留楚勇三百在郡城防守等語卽於戌刻批回令其全數八百人同赴衡山無留一人在郡並有書信與該教諭令迅至衡山追剿由衡清二縣轉交想近日卽可接到矣茲於初七日辰刻接該教諭來稟業已全往衡山甚合機宜深堪嘉尚湘勇未經戰陣宜令楚勇當先昨信亦已慮及此層土匪初起究屬烏合之衆不難於攻勦得手而難於擊獲首犯各犯總須細探該犯姓名巢穴及起事之由擒賊擒王則一戰可以成功不致逃竄紛紛又成不了之局也

■衡陽清泉稟衡山土匪滋事請速發大兵防勦由

王銓所帶之勇三百名須令其與教諭劉長佑所帶之勇同往進剿乃能得手不能分而爲二愈形單薄其何處要隘宜堵何處宜設伏均由劉長佑調度該二縣不得自行調留以期事權歸一至於添兵之說據稟府城尙存兵丁一百名又經募勇八百名足資防衛暫可毋庸派往

■衡山縣稟現在探賊蹤由

同日又據稟教諭劉長佑等管帶楚勇湘勇已到吳集又據稟楚湘各勇於初六日午刻與賊交戰斬首數十級

殺斃數百名，生擒數十名，投河淹死者，不計其數等語。土匪烏合之衆，經此次大挫後，無難立時撲滅。惟首逆唐、李、羅等未獲，急應聯絡地方公正紳耆，多覓眼線，以期擒獲渠魁，庶不致別滋事端，又成不了之局。教諭劉、長、佑人極精細，慎重有謀者。該縣傳諭該員，令其細探首逆所在，或用間，或懸賞，總期用計擒獲，無以戰勝賊潰，遂以爲功。成奏凱也。

寶慶府稟防堵出力員弁紳民據實開呈懇賜察核保奏由

賊之由長沙北竄，自稱回撲寶慶，不過聲東擊西，狡賊慣技，防守尙易爲力。惟自粵匪竄出之時，西寶東永抵瑕而入，卒之由永州東路下竄寶慶，各境得以安全無恙，則該守督同官紳防禦之功，自不可掩。俟與地方大府籌商核辦，卅底存。

教諭劉、長、佑稟初六日帶勇追剿土匪打仗獲勝由

分三股進一抄賊後，一趕向賊前，一徑上嶺。卒收抄後一股之功，可見奇正互用，兵家一定之法。該教諭調度有方，而稟報無一浮套語，可見爲實人做事，無一處不踏實也。得此一勝，無難迎刃而解，仍希嚴飭兵勇，無稍矜驕，帶兵各員，亦皆加倍慎重，約束兵勇，不許妄取民間一草一毛，再三申諭。其受傷之勇四名，即好爲調養，無令受風，陣亡湘勇一名，先給大錢四十千，優卹其家，令同隊兵勇領去。如查明例應增添，再行補給，仍令買備棺木，好爲安置，以慰毅魂。

湘鄉縣稟衡山土匪滋事生員謝邦翰等帶勇前往堵剿由

防堵迅速，足徵平日訓練有常，任用得人，故臨時措之裕如。現聞賊匪竄往衡山之東南一帶，在茶攸交界地方，湘鄉堵剿，即可少弛。

衡水道稟查辦土匪滋事將次安靜由

據稟委曲周詳，不啻晤語。衡山募勇千六百名，詳諭裁撤，想次第撤散矣。衡清二縣，前有稟來請添兵勇，本部堂業經批駁。另單言竄至草市地方，請飭茶攸上緊堵剿等語。現在張榮組尙帶勇二百在茶陵查辦土匪，卽當札飭令其加意防堵，以期四面兜截，淨絕根株。

華容縣稟地方妥堵加緊巡防查緝由

巡防嚴密，有備無患。該縣自洩任華容以來，盡心民事，晝夜不輟，清風兩袖，萬民愛戴。本部堂回籍以來，卽有所聞。觀兩次稟詞，皆腳踏實地，無浮夸語，可見才無定域，誠至而才自擴也。

前廣西知州張牧署茶陵州會稟遵奉札委會同查辦茶邑上匪，聞聞安仁會匪滋事，立即督率弁兵馳往勦賊，並生擒首從各犯，悉獲旗幟馬匹器械及搜出逆詞等件。現在地方安靜，先行稟報由。

得此一戰，衡山安仁茶攸一帶，庶可漸就肅清。初六吳集之戰，十四日簡岐山之戰，此二役者，想不逞之徒，亦可震懾而稍戢其逆志。潛涉小澗，出其不意，得手全在於此。所有生擒之要犯羅興等，審明後，卽行正法，不必解省，以省解費。大黃旗幟，回環逆詩等件，仍解省一觀。

益陽縣稟覆陳佑武綽號陳晚掣素行不法並乘機兇搶現經盡法處治由

陳佑武既係素行不法，又經拾劫拒捕，立斃杖下，自足大快人心。惟前批有先行稟覆，再行嚴辦二語，卽應稟覆後，再行處死。茲先處死，而後稟覆，稍嫌與批不符。此際頹弛縱奸之候，急於懲治，尙不失爲賢者之行。本部堂不以其後稟而加斥也。陳世椿仍須嚴拘究辦。已革武生王傳高姚化純，卽當提幟審明，立行正法。

祁陽縣稟遵奉札飭會同紳耆團練由

聞該令在祁陽甚得士民之心，稟中殫竭精誠，力圖整頓二語，能如是，天下何事不治哉？大抵此時求大有益於民，勢必不能頓，但求力去害民之人，俾良民得以安生，則利卽在是矣。欲去害民之人，必須訪求真確，以一方之藥。

治一方之病，非誠心密察不能也。該縣尙與紳耆細體其意行之！

■寧鄉縣稟奉發告示業經遵照刊刷發貼由

現在辦理團練，重在團不重在練。蓋練則製旗幟，造器械，請教師，養丁壯，爲費較多。團則合志齊心，以一方之正人治一方之匪類，雖不能大有利益，而匪類淨則地方肅清，而人得安生矣。本部堂書函告示，尙是文告之常，無關實政。仰該縣將此意，時與紳耆告誡，務須去匪而不擾民，則善矣。

■新田縣稟復頒發團防告示函諭紳耆由

除惡之法，總須訪查明確，既確則斃杖下，不過一二案，則法立而民知威矣。不可草率，尤不可留獄也。聞該縣辦事認真，故特以是告之。

■張慎之稟

劫搶之風，固宜痛懲，而誣良爲匪，尤可痛恨。此稟分別涇渭，毋令仇讎差擾等語，極爲切要。仰長沙縣嚴飭差役嗣後各搶案，若非事主及團衆指控要犯，不得妄行擒拏，以杜驚擾，而靖閭閻。

■零陵縣稟奉發團練告示及致各紳士信函分別發貼送交卑縣地方現無匪徒拜盟結會仍當隨時訪查認真舉辦

現在辦理之法，重在團不重在練，蓋練則需錢較多，恐經手不得其人，不免擾民。團則齊心合力，以一族之父兄治一族之子弟，以一方之良民辦一方之匪徒。匪類去盡，則善良安生，乃所以爲團也。稟中稱有犯必懲，不敢稍存畏難苟安之心，慰甚望甚。今日疲敝瘡痍之民，吾輩居官，勢不能別無撫摩噢咻之術，但力去害民之人，有案必究，無案不確，則造福於居民多矣。聞該縣平日實心愛民，故暢言之。

■衡山縣稟卑縣差役羅吉等並地痞張紹一現已提案管押由

此案前已札交劉教諭就近查辦，免其解送省轅。頃據該教諭來稟，已面商該縣矣。即行交出，傳諭劉委員嚴行審訊，不得因其堅不吐供，稍事寬縱。審明後，立即正法。梟首新牆地方，以懲惡差而安良善。

龍陽縣稟遵札督飭紳士籌辦團練緝匪情形由

現在辦法，重在團不重在練，即保甲之法也。清查戶口，不許境內容留匪類，一言盡之矣。練則養丁壯，請教師，製器械，造旗幟，爲費較多。恐捐費不易，民不樂從。再三斟酌，以爲鄉村宜團而不宜練，城廂宜練而不宜多。該縣稟內稱：練丁以年壯有力充之，似宜妥商，並不設立團丁名目，亦息民之道也。又稟內稱：十月赴案呈報一次，亦是虛文。團內稽察匪類，本鄉民自爲之事，若一一報官，則事事與書差爲緣，不免擾累地方。其肯呈報者，必勾通胥役，出入公庭，譌詐生事之徒。若公正謹厚者，必以呈報爲苦，二者該縣其細心酌而去之。

寧鄉縣孫義甫稟

本部堂現在辦法，重在團不重在練，即保甲之法。一鄉互相稽查，不許容留匪人而已矣。練則養丁製械，請教師，用費較多，往往因逼勒捐費，激成事端，大傷和氣，是因團而致大不團也。此案張義方等，因孫義甫團費未經交出，輒將緝勇數十人，除夕前往孫家坐排逼索，殊屬不合。義甫家竟持強拘留，反勒取錢九千，情同勒贖，亦屬刁悍。仰寧鄉縣即將在押之孫家三人，詞證周加元、熊朝炳二人，一併釋放。其應出之團費五十一千，除已交三十四千五百文，下欠十六千五百，即勒交出，以維團而息事。仍仰該縣分別申飭，勸諭速行稟覆，是爲至要。

郴州稟督同紳士辦理團練搜查土匪現在地方安靜謹將各紳士姓名開具清摺呈齋查核由

現在辦法，重在團不重在練，團即保甲之法。一鄉互相稽查，不許容留匪人。不勞民，不傷財，是團之益也。練則製器械，養丁請師，爲費較多，捐集不易，不得其人，勢輒擾民。該州紳耆如陳首二家，本部堂素知其公正可恃，此外尙多端人，仰該州與紳士細心講求，務期城廂鄉里聯爲一氣，有除暴之益而無擾民之弊，則善矣。

○衡永郴桂道稟覆現在查辦土匪由

據稟已悉，惟現在奉旨著湖北按察使江忠源帶親信練兵，前赴大營。其楚勇自應卽遣往湖北，由江臬司統帶東下追剿。昨已飛札令劉教諭帶勇回省矣。陶臬司現帶兵三百六十人，前往茶陵攸安一路搜剿土匪，可期得力。飭卽與之會商一切，以期盡絕根株，一律肅清。

○留辦軍務張牧茶陵貴令稟遵札委會同查辦金蘭會匪先後擊獲各犯正法開摺稟請察核由

四種人犯羅華捆縛前州土娼勾引西匪尤爲可惡。其逆詞回文詩句，亦可見蓄謀已久，非倉卒所辦。此次勦辦一役，而四案囚犯並就殲滅，實爲快心。其前札所謂楊林草市一帶土匪，亦卽此醜類。業已勦辦不必再往矣。惟據永州鎮沅道州又有土匪滋事，現在陶臬司前往查辦。該前廣西知州張牧應卽折回至攸縣一帶，隨同陶臬司南去，相機追剿，不必遽行回省。

○留辦軍務張牧稟奉委辦醴陵攸縣茶陵土匪事竣所有隨同出力之千總熊興柏等可否奏請獎勵由所敘醴陵攸縣茶陵安仁各路之案，歷歷如繪。署千總熊興柏把總張萬書庠生陳宏之功，自不可掩。而該牧之相機調度，六轡在手，尤見確有把持。卽當函商署督，面商署撫，奏請獎勵。

○補用府張稟報緝訊從逆匪徒三十六名業已正法由

安仁之犯十八名，仰卽處決，酌解首級，至安仁臬示。其二十餘名，訊明並無從逆不法情事者，卽可保釋，不必拘繫。定讞了結，速行回省，自是不易之理。聞此次衡山縣募勇之費，供億之煩，極爲苦累。該委員等早歸一日，則該縣早清靜一日也。前札交唐萬明一案，若人犯不能速行拘齊，卽可無庸查辦。轉飭衡山縣令其從容拏犯，待本部堂四月駐紮衡郡時，再行提訊究辦。

○平江縣稟查探湖北通城土匪滋事情形及辦理防堵由

改裝易服，查探明確，遇事既不張皇，兩路防守各官，皆駐小路，尤見布置有方。現已派朱協裕、倅帶兵五百，前往防堵，益足以資守禦。該縣惟常多莫偵卒，時常至通城探實，不時稟報，以慰懸懸。

○安化縣稟縣民朱起鳳上控譴德聰等督匪抄燒炕斃一案，業已獲犯多名，因供未審定，致未詳報，容俟勸學未獲各犯到案，提同現犯另文解審。

據稟已悉，仰即將現獲各犯，飭派幹役，押解行轅，以憑嚴訊。沿途加倍小心，無令稍有疎虞。其未獲各犯，仰該縣明查暗訪，擇其尤爲要緊者，指拏數人，並現獲之犯，須拏三十餘人，一併解轅，以憑歸案審辦。其隨從各犯，不關緊要者，即行開釋，無庸概拏。恐差役在鄉滋擾，激成事端，本部堂另有告示曉諭，該處公正紳耆及譚氏族內正人，令其將要犯捆縛送縣，免致驚懼猜疑，致生聚衆拒捕之患。本部堂辦理重大案件，但於各犯正法後，開單稟奏，並不將供招隨時咨部，亦不將各州縣隨案附參。刪一切之繁文，假州縣以便宜，以期無案不破，無犯不懲。該縣惟當設法力拏要犯，慎勿存口腹規避之心，勿存化小爲大之見，是爲至要。若再不認真，我淳淳至意，則當從嚴參辦，亦不能稍事寬容也。

寧鄉舉人張銳等稟

據稟孫華甫收各戶團費數十串，尙未交出。又鑽傷練勇身體，勒書字約，又勒贖錢票，尙未繳消。如果屬實，兇橫殊出情理之外。仰寧鄉縣差拘孫華甫，孫又一孫繩祖到案嚴訊。其前經羈押之五人，如未釋放，一並實訊，抑強安團，務得其平。如再抗不到案，即據實速稟，本部堂親行拘提究辦。

瀏陽縣周泰初稟

昨據晏永森具控周泰初清產等情，批令長沙府提訊。茲據該生稟稱：查產未與其事，備陳此案本末，尙屬秉公辦理，無庸提訊。晏永森一犯，是否危詞聳聽，仰長沙府再行研鞫，務得確供。至逆產一節，除首犯數人外，不必多爲

查封晏奉密既經該紳等稟府開釋，似不得因其子波累，沒其家產。現在征義堂一案，將次完結。仰長沙府將各逆產，再行悉心經理，出示刊碑，共見共聞，免致紳士交涉嫌疑，以期永杜物議。

武陵稟請飭禁回兵逗留生事由

據稟已悉，責成帶兵官約束，頒發告示，及飭沿途州縣，嚴拏通稟，俱屬可行。惟收繳軍器一層，恐難獨定新章。現在長沙並無調來之外兵，下游亦無回兵渡湖而南者，俟有兵旋時，再行妥商嚴辦。

平江稟探聞湖北通城土匪有聚衆圍城之說請兵堵勦由

初八日圍城抗拒官兵之說，斷不可信。凡賊匪開仗，未有約定日期，此皆無知浪傳之詞耳。既有初八之說，該縣卽不應初九發稟，待至初十早，則得初八果否來城之信矣。凡探聽賊情，須擇稍有膽者，直逼賊地方，乃許稟報。前初五日已遣江忠濟帶楚勇五百，由平入通。十三日又遣朱協帶兵五百前往協辦。該縣惟當多覓偵卒，探明各情，時時報知朱協，並報省城，是爲至要。

未陽學稟勸諭團練未便擅專懇賜德教由

清水鋪煤窑夫役數百人，劫搶拒捕一案，尙未據該縣稟到。此等夫役，若概行誅戮，未免過當，且恐激成事端。若優容不問，又恐釀久生變。仰該教諭與該縣唐令，熟籌妥商，傳各窑主，令其仍舊開挖，下游河路通暢，儘可運售。夫役有不法者，責成窑主嚴加約束。其公然搶劫者，以土匪論，人少則處以極刑，人多則發兵圍剿。先期告示曉諭，但論其果搶劫與否，不論其是夫役與否，勿以其爲夫役，概目之以匪也。唐令精細明練，必能於衆夫役中分別良莠，設法妥辦。該教諭惟當聯絡紳耆，探明窑主之賢否，藉以究悉夫役之良莠，與該州協同查辦。仍仰傳知該縣，卽日稟復，是爲至要。

龍陽縣稟遵奉憲批傳諭紳士實力辦團稽查匪類情形由